

340 (Q. 346) De Missa post nuntium obitus

1º Celebrari in casu potest Missa de *Requiem*, modo occurrens Officium diei non impedit.

Prohibetur igitur : in Dominicis omnibus ; — in Festis duplicibus 1 et 2 classis, et iis Festis quæ de jure de præcepto sunt ; — infra Octavas privilegiatas Epiphaniæ, Paschatis, et Pentecostes ; — in Feriis privilegiatis, nempe quarta Cinerum, et totius Hebdomadæ Sanctæ ; — in Vigiliis privilegiatis Nativitatis Domini, et Pentecostes ; — publice exposito SS. Sacramento.

NOTA. Ex eo quod in Decreto 2 Decembris 1891 dicitur quod hanc Missam prohibent Festa duplia 1 et 2 classis vel Festa de præcepto, non est concludendum Missam permitti in Octavis privilegiatis Epiphaniæ, Paschatis, et Pentecostes ; item in Feriis IV Cinerum, et Hebdomadæ Sanctæ ; item in Vigiliis Nativitatis Domini et Pentecostes ; nam Octavæ Paschatis et Pentecostes ac dies Octava Epiphaniæ, et Feriæ prædictæ, ac Vigiliæ tales sunt quæ excludunt quæcumque Festa duplia etiam 1 classis, et dies infra Octavam Epiphaniæ admittunt tantum Festa duplia 1 classis. Applicare hic licet id quod S. Rituum Congregatio declaravit pro Missis lectis de *Requiem* in funere defuncti (cfr. Q. 342, II. ad 5).

Prædicta confirmantur sequenti Decreto S. Rituum Congregationis : « Quæritur : Utrum Missa de Requie cum cantu, quæ... celebrari potest pro prima tantum vice post obitum vel ejus acceptum a locis dissitis nuntium, die, quæ prima occurrat non impedita a Festa 1 et 2 classis vel Festa de præcepto, cantari possit Feria IV Cinerum, Vigiliis Nativitatis Domini et Pentecostes, Feria IV, V, VI et Sabbato infra Octavas Paschatis et Pentecostes, quum licet hæ dies neque Festa sint de præcepto, neque ritum 1 vel 2 classis habeant, excludant tamen eadem Duplicia 1 classis ? » S. Congregatio rescribendum censuit : « Negative in omnibus, juxta Decretum Generale n. 3922, diei 30 Junii 1896, § III, n. 2. » (Decret. 28 Aprilis 1902, ad 10 ; cfr. Ephemerides Liturgicæ, XVI, 1902, pag. 355.)

2º Missa de *Requiem* debet celebrari solemnis, aut cantata ; Missa lecta vero iis diebus tantum permittitur quando ritus Officii occurrentis Missas de *Requiem* lectas, seu quotidianas admittit.

3º Missa in casu celebrata, sive solemnis aut cantata, sive permittente ritu lecta, celebratur solemniter, et est ritus duplicis, et consequenter unica tantum in ea dici debet Oratio, sicuti quando solemniter, id est in diebus privilegiatis, pro defunctis celebratur. Missa hæc utique dici debet secunda ex quatuor Missis de *Re-*

De Missa in diebus 3º, 7º, 30º (Q. 347) 341

quiem, quæ pro die Obitus seu Depositionis inscribitur ; imo, sepulto jam defuncto pro quo celebratur, id est, post diem qui est Depositionis, aut qui pro die Depositionis computatur (cfr. Q. 337), dicetur Oratio quæ est hujus secundæ Missæ propria. (Cfr. Q. 325, 4º, b.)

4º Celebrari debet hæc Missa de *Requiem* post acceptum nuntium de alicujus obitu, primo die liturgice non impedito (cfr. supra 1º) post acceptam notitiam.

« Notandum hic est quod, si non agatur de impedimento liturgico, sed de alio occurrente ob causam, ex. gr., pompæ parandæ, invitationis perficiendæ, etc., expectandum, ut alias, est usque ad diem liberum a duplice etiam minori. Et merito, namque Ecclesia numquam intendit extensionem privilegii ad istiusmodi impedimenta applicare. » (Ephemerides Liturgicæ, XIV, 1900, pag. 603 : Solutio Academiæ Liturgicæ Romanæ.)

NOTA. Pro hoc puncto desideratur aliqua authentica declratio, seu potius ulterior concessio. Etenim hujus Missæ celebatio non raro, imo plerumque inopinato superveniet ; — esto quod in Seminariis, Collegiis, Institutis, Religiosis Familias possibile sit omnia ordinare et præparare, ut hodie accepto nuntio, crastino die, si est liturgice liber, Missa de *Requiem* pro defuncto celebretur ; — in non paucis casibus vero hæc præparatio non erit ita facilis : ex. gr., familiares et amici non possunt plerumque de præsenti die, in quo nuntium obitus consodalis aut amici accipitur, in crastinum pro Missa ad Ecclesiam convocari ; — in Ecclesia, in qua particularis quidam desiderat Missam celebrari de *Requiem*, pro defuncto familiari aut amico cuius mortis notitiam accepit, aliæ Missæ forsitan annuntiatæ, vel exonerandæ ; etc. ; — hujusmodi impedimenta vero non sunt liturgica, talia quæ liturgicam Missæ translationem permittunt ; — itaque in variis casibus hujusmodi, pro primo die post acceptum obitus nuntium, liturgice libero, omnia non poterunt parari. Si ergo privilegium conceditur tantum pro stricte primo die liturgice libero post acceptum nuntium de alicujus obitu in dissito loco, applicatio privilegii sæpius, ut experientia jam constat, erit manca.

ARTICULUS IV

DE MISSIS DE « REQUIEM » IN DIE TERTIO, SEPTIMO ET TRIGESIMO DEPOSITIONIS DEFUNCTI.

Q. 347. Quomodo computantur dies tertius, septimus, et trigesimus, qui privilegiati pro Defunctis habentur ?